

**Bosna i Hercegovina
Federacija Bosne i Hercegovine
KANTON SARAJEVO
MINISTARSTVO UNUTRAŠNJIH POSLOVA
UPRAVA POLICIJE
SARAJEVO**

**Broj: 02-32/19
Datum: 05.03.2019. godine**

**KANTON SARAJEVO
VLADA KANTONA SARAJEVO
n/r premijera
g-din Edin Forto**

Poštovani premijeru,

bit ću slobodan da ovim putem dam svoj osvrt na Vašu jučerašnju izjavu za portal klix.ba. Iz Vaše izjave je vidljiva određena kontradiktornost u smislu Vašeg "neutralnog stava" prema meni lično, a koji nije bio prepoznatljiv prilikom vrlo uspješne i opsežne akcije Uprave policije KS u slučaju Gačić, kada ste na zajedničkoj press konferenciji uputili čestitke, ali i na Vašem twitter profilu napisali sljedeće: "Čestitam komesaru Haliloviću i Jedinici za podršku MUP-a KS. Naši specijalci ♥".

Želim Vas, kao "tih i precizni profesionalac" kako me doživljavate, a vezano za Vaš navod da Vas iznenađuje tolika podrška meni kao komesaru, obavijestiti da je ta podrška bila sasvim spontana i da je izvršena bez političkog pritiska ili bilo čije asistencije, bez obzira na to što se iz Vaše izjave tačno vidi na koje političke partije mislite. Više od 1300 potpisa policijskih službenika jasno govori koliko se cijeni rad i novostvoreni uvjeti rada unutar Uprave policije na čijem sam čelu, ali i naših napora da se odgovorno i profesionalno svakodnevno brinemo za sigurnost preko 450 000 građana Kantona Sarajevo. Podsjećanja radi, na sjednici Skupštine Kantona Sarajevo u mjesecu martu prošle godine, tadašnji aktuelni premijer Kantona Sarajevo tvrdio je da je sigurnosno stanje u Kantonu Sarajevo bolje nego što je to bilo prije mog dolaska na funkciju komesara u maju 2017. godine. "Čelnici Stranke demokratske akcije su tražili da izvršim utjecaj kako Halilović ne bi bio imenovan za komesara jer pojedinim članovima SDA nije javio da će uskoro biti hapšeni. To nisam uradio i zbog tog komesara je sigurnosna situacija sada bolja. Broj

pljački je prepolovljen i mnogo toga drugog je bolje jer je promijenjena “glava” koja nije pod utjecajem”, rekao je Elmedin Konaković.

U takvim okolnostima očekivali smo da mi Vlada KS, nakon opsežnog Izvještaja koji smo Vam dostavili, pruži u najmanju ruku priliku i da me pozove da transparentno obrazložim članovima Vlade navode i činjenice u vezi mog rada. Međutim, u roku od 24 sata i sa Vašom usmenom najavom da će se Izvještaj razmatrati bez javnog stavljanja na dnevni red pokazuje da određeni instrumenti političke moći žele “ubrzanu proceduru” razrješenja i moguće novo kadrovanje kroz instaliranje podobnih i zavisnih.

Krajnje su jasne političke igre kako navodite Vaše “neutralnosti”, zanemarujući u ovom slučaju rad, profesionalnost i požrtvovanost mene kao komesara i svih policijskih službenika koji časno obavljaju svoju dužnost kako bi sigurnost u KS bila u najmanju ruku na zadovoljavajućem nivou, a u izvještaju Vam je jasno navedeno da je sigurnost u 2018. godini za koju sam i ocijenjen podignuta na viši nivo. Očito je da se onda radi o krajnjem nonsensu, jer potvrda ocjene “nezadovoljava”, koja je istovremeno i ocjena rada policijskih službenika, u ovom slučaju samo potvrđuje da je Nezavisni odbor radio po nalogu politike koja inicira moju smjenu.

